

畿

輔

安

瀾

志

畿輔安瀾志

大通河一卷

原委

附載

隄防

橋渡

修治

官司

祠廟

水利

畿輔安瀾志

大通河一卷

原委

大通河元人所開以通通州漕運者也本名通惠河以其流入禁城謂之金水河

元史河渠志通惠河其源出於白浮甕山諸泉水也世祖至元二十八年都水監郭守敬奉詔興舉

水利因建言疏鑿總長一百六十四里一百四步
塞清水口十二處共長三百一十步首事於至元
二十九年之春告成於三十年之秋賜名曰通惠
河 又金水河源山宛平縣玉泉山流至義和門
南水入京城故得金水之名 畿輔通志金水河
卽玉河上流也

明自永樂間河凍漕廢成化正德嘉靖間屢開濬之
自大通橋起抵通州石壩長四十里更今名

明史地理志順天府大興東南有大通河亦曰通
惠河水自玉河出繞城東南下流至高麗莊入白
河卽元運河也 明會典大通河卽潞河舊爲通
惠河長一百六十餘里元初所鑿每十里爲一閘
蓄水通舟以免漕運陸輓之勞永樂以來諸閘猶
多存者仍設官夫守視然不以轉漕河流漸淤成
化正德間累命疏之功不果就嘉靖六年遣漕運
總兵錦衣衛都指揮及御史會濬之 席書漕船

志都城經通州六十里爲大通橋河 蒼叢通會
河卽今之大通河也水自玉河出繞都城東南經
大通橋流至高麗莊入白河此其源流歸宿之大
凡也蓋通會河之源雖言自白浮諸泉水而其實
皆自西山一帶千巖萬壑之水漚於西湖注大通
河流入高麗莊入於白河者也

謹案此河元時本名通惠上起西山下達通州自
明改建都城圍積水潭於苑內上游河道不復濬

泊僅於大通橋起迄於通州石壩址故又有大通之名

本朝因之不改其河道亦如明代之舊河防志謂通惠河舊名大通河先後倒置非也

舊源昌平州白浮甕山亦名神山泉

元史河渠志白浮甕山卽通惠河上源之所出也白浮泉水在昌平縣界西折而南經甕山泊自西水門入都城焉 青溪漫稿甕山在都城西三十

里清河玉泉之東西湖當其前金山拱其後 方
輿紀要金山在順天府西三十里亦曰甕山其西
有龍泉滙而爲池曰甕山泊潛通太湖白浮山在
昌平州東南十里上有二龍潭流經白浮村爲白
浮堰 畿輔通志白浮泉在昌平州東南通惠河
源山白浮村神山泉

與榆河合受一畝馬眼諸泉水滙爲七里澳卽西湖
也

永邵備考大通河西南會一畝馬眼玉泉遠甕山
後匯爲七里梁 春明夢餘錄通會河通榆河會
一畝馬眼諸泉繞甕山後匯爲七里梁又城河通
榆河會一畝馬眼諸泉 二統志通會河逕神山
泉過榆河會一畝馬眼諸泉西南流入宛平縣界
七里泊在宛平縣西北三十五里地名碾莊亦名
七里樂源山西山一畝馬眼諸泉遠出甕山後匯
爲七里樂紆回向南行數十里入高粱河

謹案甕山與玉泉山聯絡接勢實如一山通惠河
舊道此山之泉所謂甕山泊者是也陸鉞病逸漫
記云白浮水今入清河一畝泉在甕山後已塞甕
山下玉龍雙龍青龍等泉流入西湖蓋卽是今玉
泉山之源水部備考春明夢餘錄明史河渠志同
而畿輔通志

大清會典小谷薛鏡等書並云通惠河源出白浮村神
山泉攷之元史河渠志其記通惠河也以爲源出

白浮甕山諸泉水又云都水監郭守敬於舊牖河
踪跡導清水上自白浮村引神山泉西折南轉過
雙塏榆河一畝玉泉諸水至西門入都城南則神
山泉以下諸水皆其導引而非通惠之本源故一
統志以爲大通河源自昌平白浮村逕神山泉過
榆河會一畝馬眼諸泉西南流言逕言過言會最
明今神山一畝馬眼三泉皆榆河所受之水不與
大通河相灌注矣並詳榆河篇

今源自玉泉山之玉泉曰水源頭亦名玉河

元史本紀世祖至元三年八月郭守敬請開玉泉
水以通漕運從之 昌平山水記郭守敬奉詔與
水利上自昌平縣白浮村引神泉西北而南過雙
蟾一畝榆河玉泉諸水經甕山泊至西水門入都
城神山向浮皆在州之東南地勢西高東下守敬
乃能引之而西是不可曉 戴洵戴司城集玉泉
在京城西三十里西山之麓有石洞泉泉味甘冽

其在山之陽者泉自下湧鳴若雜珮泓潄百頃合
流而入都城逶迤曲折宛若流虹 都穆南濠集
玉泉山金章宗嘗建行宮今廢山之北麓鑿石爲
螭頭泉從螭口出瀦而爲池玉泉形如規瑩澈深
靚掬飲甚甘其東石梁橫跨泉由之東流入湖東
南至大通河爲京師八景之一西山爲京師之勝
而玉泉又西山之勝 帝京景物畧觀音石閣而
西有隆教寺又西上圓通寺望太和庵前山中人

指曰山盡頭泉所源也 燕都遊覽志玉泉或名
之噴雪泉 春明夢餘錄水源頭兩山相夾小徑
如綫亂水淙淙入數里有石洞三旁鑿龍頭水從
龍口噴出水分二支其一伏流地中至玉泉山湧
出山頂舊刻玉泉二字 方輿紀要玉河在順天
府西源出玉泉山流注西湖東南入大通河亦謂
之御河

東流出山爲裂帛湖

宋啓明長安可遊記裂帛湖泉仰射如珠串古榆
陰潭上極幽秀、區懷瑞遊業呂公洞稍東爲龍
王祠渟泓方廣數丈湧泉如珠名裂帛湖然玉泉
山傍每遇石縫卽迸流濺雪不特裂帛湖 帝京
景物畧玉泉山根碎石泉湧去山不數武裂帛湖
也泉迸湖底狀如裂帛渙然合於湖湖方數丈水
澄以鮮漾沙金色 畿輔通志裂帛湖在宛平縣
玉泉山望湖亭之下

其下爲西湖卽今昆明湖也則有丹稜汧水高粱河
官河及龍泉雙泉青龍諸泉入之

紀纂淵海西湖在玉泉山下環湖十里爲一郡之
勝觀 長安客話西湖去玉泉山僅里許卽玉泉
龍泉所潄此地最窪受諸泉之委滙爲巨浸土名
大泊湖沙禽水鳥出沒隱見於天光雲影中可稱
絕勝 燕都遊覽志由香山至望湖一水夾溝而
出荇草交漬凡三里許水漸狹隱隱不知所之遊

者遂以西湖止此望通衢取道入城不知轉入林
中灌水忽開回隄十里鵝鵲鵝鵲低飛遠立遠水
長流不減杭之段家橋也 二統志西湖在宛平
縣玉泉山下舊志玉泉之水明季南人興水田之
利盡決諸窪堤塍畝畝宛似江南

蓮案丹棱泝水平地湧泉水亦西南出潛通琉璃

廣陽諸河

王嘉謨薊邱集海堃凡二南則箭於白龍廟又南秦於湖北斜鄰樓陶河又西

五里爲甕山又五里爲青柏河南流入於淀之夕陽延而南者五里旁巴溝鄰曰丹稜泝泝之大以

百頃十畝豬爲湖循汴而町塍相連有石梁曰西
勾復豬爲小溪又南爲陂五六汴水再豬爲溪有
村曰東雉水入地中出於巴溝自溝達於白石以
入於高粱河而北自嵯岫入於西溝東有古祠斷
碑尚存乃元上都路制使朶里真
撰文上有丹稜汴字餘皆磨滅 又水經注高粱

河首受濕水自渾河改流上游已斷元人猶引水

入積水潭以爲通惠河之助至今因之詳桑乾河

篇

朱國楨湧幢小品外海子卽古燕積水潭也源
出西山一畝馬眼諸泉繞出甕山後匯爲七里

樂紆回向南行數十里稱高粱河將近城分爲二
外繞都城水門內注潭中流逕玉河橋合外墮入
於大通河 方輿紀要高粱河在昌平州西徑州
西南三十里之沙間泉又東南逕高粱店又東南

流入都城積水潭今大通河蓋卽高粱河下流也
一統志高粱河在宛平縣西今爲玉帶河上流

又官河卽一畝泉分流也

方輿紀要官河在昌平州西南三十里源出一

畝泉分爲二流一曰官河流入宛平縣合高粱河
元史河渠志雙壩河源出昌平州孟村一畝泉

水經雙壩店而東至豐善村入榆河又龍泉在金
畿輔通志在昌平州西南二十里

山寺玉龍洞

長安客話華嚴右半里爲金山寺有玉龍洞洞出泉甃石爲暗渠引水伏

流約五里入西湖名曰龍泉望湖亭建其上

又香水院雙泉在西山法

雲寺

袁中道珂雪齋集法雲寺在西山後近寺有雙泉鳴於左右遇石梁屢級而上至寺門內

有方池石橋間之水泠然沈碧雙泉交會處也至
三層殿後乃得泉源西泉一石罅間經茶堂兩廡

繞雷而下東泉出後山經蔬園入香積廚而下會於前之方塘是名香水也 陸氏病逸漫記白浮

泉今入清河一畝泉在甕山後已塞甕山下玉龍雙龍青龍等泉流入西湖 又青龍泉

卽青龍橋河也

長安客話甕山北五里青龍橋元時白浮堰之上游也

又東流逕

圓明園南又東流逕

暢春園南又東流逕廣源白石高梁澄清諸閘出青龍

橋下其長五十餘里至都城西北隅分爲二支一支

環

京城爲濠

明實錄熹宗天啓元年十月辛巳濬京城濠成自東便朝陽東直安定德勝西直阜城西便正陽九門及重城共用夫一百五十萬八百九十名匠二百八十九名班軍積目三萬三千十二名費水衡銀六萬一千六百二十九兩司農銀一千七百三十二兩米三千三百一石諸椿木灰磚繩斗百物及運費咸具監工科道魏大中等因言濠之源出

玉泉山經高粱橋抵都城西北而派爲二一循城之左而東而南一循城之右而南而東宜按舊闢爲地形高下次第布之未可以丈尺概也德勝門之水南入關周行大內出玉河近且北淤南壅而嘉靖庚戌所築重城地勢旣高有掘未及泉而止者俟異日清其源審其勢疏其派達其支以總匯於大通橋又須理葺諸間節宣洩以壯金湯而固風氣 蓬窓日記京師白水爲玉河出玉泉山

二統志城濠之水源出昌平州白浮村之神山泉
通榆河會一畝馬眼諸泉匯爲七里灤東流環都
城曰玉河又西山之玉泉從水關逕銀錠橋玉河
橋入城濠合流至大通橋入漕河明嘉靖中工部
尚書雷禮以外城濠池淺狹請悉深濬水乃自城
西北隅環城東注歷九橋九閘從城東南隅流入
大通橋

一支由德勝門水關入於

皇城

明史地理志宮城之外爲皇城 史弱翁舊京遺
事大城內爲皇城 長安可遊記德勝門之西城
垣下有水竇焉西山諸水從此流入都城水口爲
石虎以當之遏衝緩水勢也而庵其上名曰觀音
庵其北卽水入處泠泠有海潮之音 一統志玉
河分流而入德勝門西水關又大通河由海淀折
東南流至西水門入都城 天興縣志玉河又一

派自城西北址而入白水關宛平縣志京師之水自西北入由東南出府東南流爲運河入而滙聚若湖然白水關關東距德勝門南距西直門澄泓一片周回數里

過五龍亭前滙爲西海子亦名北海子遼時謂之瑤璣金曰西園瓊華島元曰積水潭又曰西華潭亦曰太液池其與金水河隆福宮前河水通和灌注

遼史地理志南京析津府燕山中瑤璣一金史地

理志西園有瑤光臺又有瓊華島 元史地理志
海子在皇城之北萬壽山之陰舊名積水潭聚西
北諸泉之水流入都城而滙於此汪洋如海都人
因名焉 又河渠志通惠河至元二十八年都水
監郭守敬建言疏鑿至都城南滙爲積水潭金水
河流至和義門南水入京城隆福宮前河其水與
太液池通 元掖庭記太液池在西苑中葛邏祿
迺賢云西華潭卽今之太液池也 二統志西海

予在宛平縣西北三里舊名積水潭東西亘一里
餘南北半之西山諸水從高粱橋流入北水關漚
此亦名蓮花池水北有淨業寺因名靜業湖其水
從德勝橋東下舊引水爲池一望無際 又玉河
分流

皇城內五龍亭前名北海子

御苑在元隆福宮西厚載門北明亦曰西海子卽西苑
也 〔永部備考〕大通河貫積水潭 〔明實錄〕英宗

天順四年九月新作西苑殿亭軒館成苑中舊有
太液池上卽命太液池東西作行殿 燕都遊覽
志太液池在子城西乾明門外周遭凡數里其源
自玉泉山合西北諸水流入都城德勝門滙爲積
水潭亦名海子至北安門水關流入西苑人呼西
海子 春明夢餘錄通會河東入都城西水門貫
積水潭積水潭者西海子也河來自玉泉山經高
梁橋分而爲二一灌城隍一從德勝水關滙入後

湖

又折而東南繞爲

南苑亦謂之小南城

蔣德璟懋宣紫荊城有護城河河卽御溝也河自
北關口分流經內官監白石橋大高元殿之東北
上西門之外至紫荊城下而東而南經大廟之東
至芝宮飛虹橋之西而其在西一派則自太社太
稷壇至靈臺寶鈔司之東合流於湧福之河以出

劉若愚燕史從陽德門外皆可以至玉河是河也
由北安門外藥王廟由西橋下入經靈臺寶鈔
司東上護城之西派合流過長安右門之北經承
天門前再東迤長安左門之北自湧福閣會歸於
皇城之巽隅而總出焉自皇史宬東南有門通河
河上有湧福閣俗所謂騎馬河是也迤東沿河稍
北則呂梁洪東安橋是河也從北安門外文昌宮
迤東步糧橋入經皮房內織染局巾帽局御馬監

東東安門橋下至長安左門外迤東之玉河橋出
焉春明夢餘錄太淑池水又分爲二一環遶靈
臺寶鈔司東與護城河合流過長安右門之北經
承天門前再東過長安左門之北自湧福閣下從
巽方流出經玉河橋與城河會一自元武門之西
從地溝入由懷公門過長庚橋裏馬房橋南從地
溝亦至巽方而出會於沙河橋

今爲

御苑中曰瀛臺

蔣一葵堯山堂外紀瀛臺在

皇城內太液池南卽明西苑池舊爲南臺自西華門之

西百步入

西苑門苑內渟泓數百頃引西山玉泉逶迤百折分派

達池

又東流入

紫禁城出玉河橋下爲

御河又曰裏河卽元之遼河也

方輿紀要玉河經大內出都城亦謂之御河〔春
明夢餘錄〕西山玉泉經越橋俗謂之銀錠橋流入
西苑達宮禁自玉河橋出〔一統志〕玉河分流入
大內由金水橋出玉河橋亦名御河元時曰金水河以
其自西門入故名〔天興縣志〕玉河穿

宮牆而入御溝曰裏河環

紫禁一週復向東南出曰玉河橋

由東長安門出正陽門東水關歷崇文門元時謂之文明河

元史河渠志通惠河東南出文明門春明夢餘錄南城三里河元時運河名文明河在天地壇前去通州五十里地形高通州六丈九尺置二閘可行舟今鐵閘尙存日下舊聞張爵紀五城坊巷衛衛南城正東坊有西三里河東三里河盧葦園崇南坊則有南河漕子家灣遞運所纜竿市又有

三轉橋紀家板橋雙馬莊八里莊十里河皆三里河入張家灣故道今其名雖存而深谷爲陵遺跡漸不可考矣

謹案元史河渠志通惠河東南出文明門東至高麗莊入白河文明牖二上牖在麗正門外水門東南下牖在文明門西南一里然則文明河卽通惠河無二道也春明夢餘錄謂三里河卽文明河亦以三里河曾入通惠遂以爲卽元文明河其實非

也又曰下舊聞成化間楊尚書鼎喬侍郎毅同袁
參將曾勘稱三里河源出彰義門外玉匠局等處
馬跑等泉則自西而東不知從何處流入考明實
錄楊喬袁會勘回奏云城南三里河至張家灣迤
河口延袤六十餘里舊無河源正統間因修城濠
作壩蓄水慮雨多水溢故於正陽極東南低窪處
開通濠口以洩其水始有三里之名又云若引草
橋之水必須於大祀壇邊一路創鑿溝渠亦恐有

礙況其源又止出彰義門玉匠局等處馬跑等地
泉亦不深遠則是所云源出彰義門外草橋之水
也朱氏所引誤也

又稍北出東便門東水關而東爲東西河沿與護城
河會流有草橋泡子諸河合入之今皆廢

永部備考大通河東行會南北城河合流 天興
縣志玉河與城河匯而東流自東便門城垣穿出
又分流而環繞府城四面歸於大通河

謹案護城河亦曰月河舊有月河寺在朝陽門外

草橋河在京城南泡子河在大興縣東

莽明夢餘錄今右安

門外西南泉源湧出爲草橋河接連豐臺爲京師

養花之所燕都遊覽志泡子河在崇文門之東
城角前有長溪後有廣淀高堞環其東天臺峙其
北大興縣志京城內東南角窪然一水泡子河
也

又東流出大通橋下

永部備考通惠河由大通橋東下二統志大通

河經東便門外大通橋

又東流五里逕王家莊之慶豐閘又東流十一里逕郊亭南之平津上閘

謹案潞沙筆綴通州至都城中塗有高米店或呼高碑店松漠紀聞潞縣三十里至交亭三十里至燕今云高米店疑卽古之交亭交高音譌也 病逸漫記白浮泉一自東會入通惠河四里至慶豐卅一里至平津慶豐地形高平津一丈許水陡絕故平津開則慶豐河身立見矣

又東流四里逕平津下閘又東流十三里爲馬連灣
入通州西界過普濟閘逕高麗莊與渾河舊口合流
元史河渠志通惠河東至高麗莊 水部備考大
通河東下通州高麗莊入白河 方輿紀要高麗
莊在州西十二里盧溝河所經

又東流四里出八里橋下卽永通橋也又東流八里
逕通州南門外又東流抵葫蘆頭石壩穿新舊城東
出抵土壩與潮河合卽北進河也俗謂之裏漕河

議疇耳烈至通州入白河者大通河也 篷窗日
記玉河注通惠河與白河合 河防志通惠河至
通州分流一自舊城西水門流入城內至東水門
出一自新城西門外遶新舊城南折而東北乃合
流至張家灣城東門外入潞河 方輿紀要大通
河俗謂之裏漕河

大清會典自大通橋抵通州石壩四十里 大典縣志
通惠河直達通州與潞河會以通漕也爲其地勢

下流易洩在在聞以蓄之

折而北逕大通關

方輿紀要大通關在通州南張家灣之長店百貨聚集處也

滙爲張家灣有凉水河出自南海子西流入之

方輿紀要燕錄曰白河至州東折而迤西處曰張家灣蓋盧溝與白河會流處也 天興縣志凉水河通南海子所以宣洩海子所出之水

謹案京水河舊爲渾河分支下入白河今由南海子東流入運並詳永定河白河二篇

下入天津縣由北門外爲海子入於海

方輿紀要通惠河自京城東至通州城南會於白河又南直會沽入海凡二三百里俱曰通惠河

河防一覽楊村以北通惠之勢有若建瓴白河之流淤沙易阻夏秋水漲則懼其潦冬春水微則病其澁浮沙之地旣難建閘以備節宣惟有濬築之

功殊爲喫緊

附載

白蓮潭今湮

〔金〕史河渠志漕渠金都於燕東去潞水五十里故
爲牖以節高粱白蓮潭諸水以通山東河北之粟
清水澗在西山

薊邱集清水澗兩山如門行百二十里奇峭龍嵒
圓通寺泉在西山

山行雜記山中諸泉圓通寺門水第一寶藏次之

臥佛寺泉在西山

山行雜記由臥佛寺殿右側出小門西數十步有
巨石特立高可三丈鑿石爲磴以上爲觀音堂前
臨池右有泉有橋度橋爲隆教寺泉從寺前度泝
泉行三里上嶺爲五華寺下嶺循水行再登一嶺
爲廣泉寺循故道下復上得圓通庵其右爲太和
庵泉水源於此水冬夏不涸村民多取汲於此

黑龍潭

周箕析津日記黑龍潭歲旱於此禱雨一一統志
黑龍潭在大興縣南黑窑廠施閏章愚山集京
師三黑龍潭在南城黑窑廠禱雨之地也潭一方
池泉水涸時中有一井以石甃之

大庖井

焦竑玉堂叢話黃諫嘗作京師泉品謂玉泉第一
滿井

帝京景物畧出安定門外循古濠而東五里有滿

井井面五尺無收無幹幹石三尺井高於地泉高
於井 明大學士蔣德璟記畧出安定門從北郭
壇繞後取西山過大教場行麥田間二里許折而
入卽滿井也三面皆窪地而井獨高黝不見底因
繫石於綆測之可二十五尺下皆樹根也根下復
得丈許其大五圍井千百年嘗滿大旱不縮大旱
不冰溢井幹而上爲小石甬受之上有亭四周爲
小石溝蜿蜒而下滙於池遂與東南水會於通州

謹案昌平州志滿井在州南十六里蓋又一井也
苦井在京城內蘇州衙衙

劉井在翰林院

王佐翰林記劉井學士劉定之所浚

蓮池在翰林院內

詹事府井在詹事府署內

昊天寺井

析津日記昊天寺遼刹也寺門一井特清冽

金井在大興縣南魏村社

三里河

二統志在大興縣東南元時名文明河接通惠河
爲糧儲運道置鐵閘明時湮廢今故道已成平陸

明憲宗實錄城南三里河自濠口三甲至八里
莊始接運河舊有渠又迤南入張家灣白河其水
深處二三尺淺處尺餘闊處丈餘窄處未及一尺
謹案三里河卽文明河說本孫承澤辨見原委文

明河下

南海子在大興縣卽飛放泊也

元混一方輿勝覽下馬飛放泊在大興縣正南廣四十頃北城店飛放泊黃埃店飛放泊俱廣三十頃〔吳偉業梅村集南海子周環一百六十里有水泉七十二處元之飛放泊也〕

〔明統志〕南海子

在京城南二十里舊爲下馬飛放泊內有晾鷹臺永樂十二年增廣其地周圍凡一萬八千六百六

十丈中有海子三以禁城北有海子故別名南海子
子 二統志南海子在永定門外二十里亦名南苑
畿輔通志飛放泊卽南海子水自萬泉莊平地湧出共
滙於此爲海子大小凡三方一百六十里線以垣牆四
面各爲門物產充牣爲游獵之地減水河在京城南

明實錄宣宗宣德九年六月行在工部尙書吳仲
奏北京東南有雨水磨及通惠河該閘皆爲河水

所壞今南門外舊有減水河若加疏鑿長二十餘丈卽與郊壇後河通流可洩水勢上曰盛夏未宜疲勞姑緩之英宗正統五年六月仍會官計議於城外宣武橋西量作減水河以洩城中諸水上命勘視欽天監正皇甫仲和言宣武門西舊有涼水河其東城河南岸亦有舊溝皆可疏通以洩水勢上是之 日下舊聞成化中楊尙書鼎喬侍郎毅同袁叅將佑會勘稱三里河源出彰義門外玉匠

局等處馬跑寺泉則自西而東不知從何處流入
劉忠愍所云涼水河及城河南岸舊溝亦不辨所
在海波寺久廢其街之南有清嚴潭上有龍王堂
又南東爲章家橋又南爲虎坊橋橋西南爲潘家
河沿計新城未築時無地無水今其故道皆不可
考矣

謹案金史本紀章宗承安元年二月幸都南行宮
春水三年正月如城南春水名行宮曰建春四年

如建春宮上諭點檢司曰自蒲河至長河及細河
以東朕常所經行官爲和買其地命百姓耕之仍
免其租稅則當日之城南誠水鄉也今諸河故道
洶不可考矣

壩河

元史河渠志壩河亦名阜通七壩 畿輔通志阜
通河在大興縣東一名壩河 大興縣志壩河在
東直門城角

香山泉在宛平縣西北三十里香山上

〔天府廣記〕香山在碧雲南二里許上有大石狀如香爐蝦蟆有泉出自山腹下注溪谷曰小清涼

宛平縣志香山在城西北三十里

丹砂泉

〔春明夢餘錄〕在香山下相傳葛稚川丹井二泉水上湧一泉水橫流味極甘冽

狼兒澗

謝榛四溟山人集在香山東四里許

清泉在宛平縣西青山嶺

二統志青山嶺在宛平縣西一百五十里中平坦
四面高聳下臨清泉

寒泉在宛平縣西馮家里

戴斗夜談宛平縣京西鄉馮家里舊有太乙集仙

觀元元貞元年以其地界純一真人

缺一字

全祐有

栗五千株全祐相栗林隙地重岡環抱下有寒泉

旁池衍沃可引灌溉

魚藻池

燕都遊覽志魚藻池在崇文門外西南俗呼曰金魚池〔春明夢餘錄〕魚藻池在南城東南一帶皆泉元人三里河之源也今坎而爲池以養魚

謹案三里河明實錄以爲開築壩引水乃有此名則是無源之水孫承澤以爲卽元文明河又以魚藻池爲三里河之源亦附會之說也

玉蓮池在宛平縣五華山上

玉淵潭

二統志在宛平縣西十里元人丁氏故池池上有亭亦以玉淵爲當時遊宴之所畿輔通志玉淵

亭在宛平縣玉淵潭上俗呼百官廳蓋元時士大夫休暇宴遊之所釣魚臺在花園村玉淵潭上泉水至冬不竭

郊亭淀地無考

〔謹案〕疑卽積水潭

燕家泊在宛平縣

方輿紀要燕家泊在順天府西北二十五里廣袤
五十餘畝東南流入府四十里之玉淵潭亦曰丁
家潭

義井在宛平縣西十里或曰密井

隄防

白浮隄在甕山白浮村元時建

元史本紀世祖至元二十八年十二月浚運糧壩
河築隄防順帝至正十四年四月命各衛軍人修
白浮甕山等處隄堰

白浮堰

二統志在昌平州東南元郭守敬興修水利起白
浮村下至青龍橋長五十餘里

趙家隄裂帛湖隄也見長安可遊記

西湖隄在西湖北岸亦名長隄

明實錄成祖永樂二年八月北京行部言宛平昌平二縣西湖景東牛欄莊及青龍華家壘山之閒水衝決隄岸百六十丈命發軍民修治五年九月修西湖景隄三百九十九丈 山行雜記西湖北岸長隄五六里隄柳皆合抱

玉河隄

燕都遊覽志在東長安門翰林院東畔有坊坊署
曰玉河東西堤其南北有三石梁西隄舊有高柳
蔭水面崇禎己巳冬官軍盡斫爲薪僅存翰林院
東牆一帶矣

玉泉新閘康熙二十二年建

二統志在宛平縣玉泉山

青龍閘

二統志在宛平縣西北三十五里青龍橋下

白石閘

二統志在宛平縣青龍閘橋東二十里元至元二十九年建

廣源閘

長安客話出真覺寺循河五里玉虹堰臥界以朱欄爲廣源閘俗稱豆腐閘卽此引西河水東注深不盈尺宸遊則渚水滿河可行龍舟每通惠河水涸糧運不前則遣官於此祭禱請焉 二統志廣

源閘在西直門外七里元至元二十六年建又府西南有文明上下二閘今廢

高粱閘

〔金史本紀〕承安三年命勿毀高粱河牐從民灌溉〔永部備考〕高粱閘在西直門外迤北一里許高粱店元至元二十九年建名西城閘明重修之改今名

澄清閘

水部備考澄海閘在鼓樓南海子東岸萬寧橋西
元至元二十九年建名海子閘

謹案以上六閘皆玉河閘閘舊止有五蓋玉泉新
閘未建也考水部備考所記如此河程記因之而
明實錄稱永樂五年五月北京行部言自昌平縣
東南白浮村至西湖景東流水河口一百里宜增
置十二閘請以民丁二十萬官給費用修置命以
運糧軍士浚之不知其何所指如以元人所建起

白浮村至通州合上下言之則又不止此數其或記載之訛也又澄清閘卽南海子閘而西海子亦有閘曾興以非運道所關故不記今錄於左

北閘在西海子

燕史金海橋稍南有防曰衆音祥橋其東則北閘口也

謹案四元集從芭蕉園南循水通西海子半里有牐瀉池水卽此閘

響閘一名響水閘在宣武門外以節宣玉河之水

張爵五城坊巷衢集宣北坊在新城廣寧門裏
宣武門迤東響閘以西至都城西南角便門西北
角 珂雪齋集過響水閘至龍潭樹益多水益濶
是爲西湖

慶豐閘新建閘

永部備考慶豐閘在都城東王家莊至大通橋八
里元至元十九年建有上下二木閘名籍東至順

元年易以石改名慶豐明嘉靖七年并二閘爲一

二統志康熙中於上流增建一閘曰新閘 元

宋娶都水監改修慶豐石牐記畧牐於字爲閉城
門具或曰以板有所蔽近代水工用之以時蓄洩
水行船世祖皇帝至元二十九年都水監郭守敬
渠通惠河貫京城迤邐出南水門過州抵高麗莊
之壩爲里二百視地形創牐附崖壁及底皆用水
凡二十四慶豐其一也後二十年常至大四年諸

牘浸腐宰相請以石易爲萬世利有司以次第舉
由是至順元年始及慶豐之役據都水少監王溫
臣率其屬分督程作日役士卒及土木金石之工
千有五百五十掄木萬章鐵以鈞計凡八百有奇
石材三千一百餘甓灰藥他物無算築基縱長百
有二十尺三分長之二爲衡高二丈間容二丈二
尺經始於是年之望粵六月十有五日告成

平津上下二閘

永部備考平津上閘西至慶豐閘十五里平津下
閘西距上閘七里俱至元二十九年建舊係木牘
名郊亭延祐後易以石改名平津一統志平津
閘在大興縣東明宣德七年重建

大通橋閘朝陽門橋閘東直門橋閘回龍閘

二統志大通橋閘在東便門外大通橋下又朝陽
門東直二門外橋下俱有閘其下又有回龍閘皆
康熙中建

普濟閘

一統志普濟閘在通州西十二里舊有上下二閘相距五里又西去平津下閘十三里元至元二十九年建木閘名楊尹閘延祐中易以石改今名今并爲一閘

南浦閘

一統志南浦閘舊有閘後廢今復建

減水閘原爲滾水閘雍正二年改通流閘舊普濟通

流俱有上下二閘今各廢其一

七省漕程通州城內有通流閘過天橋永通橋十二里至普濟閘十三里至平津下閘四里至平津上閘十一里至慶豐閘五里至大通橋入都城五府白糧俱入京倉又有土橋廣利二閘亦廢王瓊漕河圖志通流上下二牐上牐在州治西門外西至普濟下閘十里下閘在南門外西北至上閘五里元至元二十九年始建木牐曰通州延祐以

後修石牐改名通流廣利閘在張家灣中馬頭西
上至上閘五里元至元二十九年始建木牐名河
門牐延祐以後修石閘改名廣利 明寶錄成祖
永樂五年五月工部言北京文明河至通州五閘
合設船二十艘從之六年四月設北京通惠河慶
豐平津澄清通流普濟六閘每閘置官一員十年
五月浚北京通流等四閘河道共一萬七百三十
丈嘉靖二年三月御史何信請修復大通橋至張

家灣廣利等八閘以紓民陸運之苦 睿明夢餘
錄通惠河嘉靖間御史吳仲議修築立五閘閘置
剝船六十每米一石減陸輓費銀四錢五釐歲省
漕銀十餘萬兩

謹案慶豐閘以下俱爲大通河閘攷明實錄英宗
正統三年五月造大通橋閘成行在工部請撥丁
夫監守且以隸附近慶豐閘官從之是大通建於
前明朝陽門以下爲

本朝新建也又明實錄宣宗宣德七年四月已丑修通
州羊營閘橋時平橋之水衝閘隄岸皆圯羊營在
宛運所經由之路橋壞已久戶部以聞故有是命
羊營閘今亦廢久矣 附元史河渠志元壩牐之
名曰廣源閘西城牐二上牐在和義門外西北一
里下牐在和義水門西三步海子牐在都城內文
明牐二上牐在麗正門外水門東南下牐在文明
門西南一里魏村牐二上牐在文明門東南一里

下牐西至上牐一里籍東牐二在都城東南王家
莊郊亭牐二在都城東南二十五里銀王莊通州
牐二上牐在通州西門外下牐在通州南門外楊
尹牐二在都城東南三十里朝宗牐二上牐在萬
億庫南百步下牐去上牐百步
月西城牐改名會川海子牐改名澄清文明牐仍
用舊名魏村牐改名惠和籍東牐改名慶豐郊亭
牐改名平津通州牐改名通流河門牐改名廣利

楊尹牘改名溥濟武宗至大四年六月省臣言通
州至大都運糧河牘始務速成故皆用木歲久木
朽一旦俱敗然後致力將見不勝其勞今爲永固
計宜用磚石以次修治從之後至泰定四年始修
完焉

長源閘長清閘安豐閘順成閘俱在宛平縣安豐閘今廢

雲津閘天興閘翔帆閘俱在大興縣天興翔帆二閘今廢

謹案以上七閘皆會清河閘也一統志長源閘在

宛平縣西北會清河上流自下有長清安豐順成
雲津天興翔帆凡七閘俱康熙四十六年建

阜通河壩元阜通七壩也潭溝壩九處玉村壩二處
鄭村壩一處西陽壩三處郭村壩三處於斯壩一處
石壩在通州

大清會典通州壩一石壩 行水金鑑自大通橋起至
通州石壩四十里地勢高下四丈中間設慶豐等
五閘以蓄水

橋渡

青龍橋在宛平縣西北三十五里

長安客話甕山北五里爲青龍橋元時白浮堰之上遊也其西通金山口其北斜界百望山

上麥莊橋西去青龍橋一里許

帝京景物畧水從高粱橋而西有上麥莊橋過橋爲湖又行一里有村上青龍橋卽玉泉山下也

高宗純皇帝御製麥莊橋記勒於石

高粱橋在西直門外半里跨高粱河上

並見永定河篇

帝京景物畧水從玉泉來三十里至橋下夾岸高柳絲垂到水

神虎橋在西直門外

帝京景物畧雙林寺西二里有神虎橋橋四石虎萬曆中一虎夜逸遂名三虎橋

白石橋一名越橋亦名月橋元之周橋也在地安門海子南

陶宗儀輟耕錄直崇天門有白玉石橋三虹上分
三道中爲御道鐫百花盤龍星拱 燕都遊覽志
海子南岸舊有海子橋亦名月橋俗呼三座橋近
漸圯 天都宮殿考南麗正門千步廊可七百步
建靈星門門建蕭牆周回可二十里俗呼紅門闕
馬牆內二十步有河上建白石橋三一座名周橋
橋四石白龍擎載旁盡高柳鬱鬱萬株
德勝橋在德勝門內積水潭東水注橋下東行

燕都遊覽志德勝橋在德勝門內西有積水潭潭
水注橋下東行橋卑不能度舟抵橋俱登岸只舟
順流始得渡復登舟東泛轉而南得黎光橋

黎光橋在德勝橋南

水關橋在德勝門西

〔長安可遊記〕德勝門之西城垣有水關西山諸水
從此流入都城水口爲石耳以當之遏衝突緩水
勢也

萬寧橋

二統志在海子東岸跨玉河上流

銀錠橋在地安門西北一名玉河橋

燕都遊覽志銀錠橋在北安門海子三座橋之北
此城中水際看西山第一絕勝處也

玉河橋在正陽門內跨玉河之上

燕都遊覽志玉河南北有三石梁
〔明志〕玉河橋
凡三一跨東長安街一跨文德坊一近城垣 燕

史御河橋卽金海橋

余祥橋

蕪史金海橋之稍南曰余音引祥橋其東則北閘口也

東部糧橋西部糧橋

畿輔通志在地安門北迤東又西爲西部糧橋

大興縣志東部糧橋在厚載門外迤東

地安門橋在地安門內鼓樓前

天興縣志厚載門橋在鼓樓前

御龍橋

宇文懋昭大金國志承安三年春國主幸蓬萊院
宸妃嘗與主同輦過御龍橋

龍津橋

〔北轅錄〕入豐宜門過龍金橋橋分三道通用奪玉
石扶闌上琢爲嬰兒狀甚工巧 石湖集龍津橋
在燕山宣陽門內以玉石爲之引西山水灌其下

天津橋

天金國志宮城四圍凡九里三十步自天津橋之北曰宣陽門內城之南門也

宜泉橋

宋裴燕石集循宜泉橋北少東園南有金太祖武

元皇帝碑

橫橋在西直門大街

乾石橋在宣武門內大街

釋湛祐宏慈廣濟寺志寺東望西安門西接平則門帝王廟南鄰乾石橋萬松老人塔北近大街象坊橋在宣武門內西

五城坊巷衚衕集阜財坊四牌二十四鋪過象坊橋有王恭廠長安客話象坊在宣武門內城牆北每歲六月初伏官校用旗鼓迎象出宣武門濠內洗濯

正陽橋在正陽門外崇文宣武門外亦各有橋跨護

城河上

三里河橋在正陽門三里河上明天順中建長七十丈有奇正德十二年重修

析津日記重建三里河橋碑在橋西鐵山寺碑建於正德十二年翰林修撰江陰周敘撰文 碑畧都城迤南有河焉乃隍水之支流也河之上有橋橋之名曰三里其始創自天順間厯歲旣久土崩石泐往來乘載者病焉時有坊間善士戴通者別

爲改作與僧鐵山謀之廣爲募緣不數日而集銀
兩千七百七十有奇撤故橋降七尺以爲基高十
四尺有奇視舊加四之一衡二十有四尺視舊加
六之一縱四十尺視舊加六之一益堰石三十尺
有奇視舊加三之一石闌板視舊加三之一石闌
柱視舊加四之一橋之西東各窰五尺增築底平
衡皆四十尺有奇其東之縱三十尺西之縱六十
有二尺橋之北南作耳橋者三一瞰乎寺之南泉

一拱乎巷之鞭子一揖乎街之半邊不惟達是橋
之街路抑且殺河之勢而關流之伏也延袤共七
百尺有奇越五月而工成時正德十二年丁丑

華石橋在正陽門內西

新橋在東直門大街

大石橋在崇文門內東南

泡子河橋在崇文門內東

虎坊橋在崇文門外西南三里

馬市橋在阜成門內大街

北大橋在阜成門內北河漕

草橋在右安門外南十里

燕都遊覽志草橋泉水所歸種水田者資以爲利

十里居民皆蒔花爲業 帝京景物畧右安門外

南十里草橋唐時有萬福寺寺廢而橋有橋去豐

臺十里中多亭館

普濟橋在廣寧門外康熙中建

以上諸橋皆在玉河宛平大興所屬

大通橋在東便門外

燕都遊覽志出東便門有大通橋水從玉河中出
波流演迤帆檣往來可達通州 病逸漫記大通
橋去通州四十里地形高通州五丈置十間方可
行舟

永通橋在通州西普濟閘東明正統十一年敕建祭
酒李時勉作記以去州治八里亦名八里莊橋爲陸

運京儲之通道

明李時勉永通橋記畧通州城西八里有河京都諸水會流而東河雖不廣每夏秋之交雨水泛溢常架木爲橋比舟爲梁數易輒壞內官監太監李德以聞於上欲於其地建石橋乃命侍郎王永和提督之橋東西五十尺爲水道之券券與平底石皆交互通錮以鐵分水石護以鐵柱當其衝橋南北二百尺兩旁皆以石爲闌表二坊題曰通水橋

蓋上所賜名也經始於正統十一年八月告成於

十二月明年三月立石

臥虎橋在通州北關月城外舊以板爲之明萬曆六年工部郎中李熹易之以石

南燕橋在通州東關外稍南通惠河上爲寶坻香河大路俗名哈叭橋

運糧橋在通州舊城南關跨城河明萬曆中建

本朝順治十二年重修

南浦橋在通州城南跨大通河舊有閘後廢今復建
通運橋在通州南張家灣城南舊名南門橋後圯明
萬曆三十三年重建石橋

土橋在通州南舊建閘後廢

以上諸橋皆在大通河大興縣通州所屬

修治

元史河渠志通惠河世祖至元二十八年都水監郭
守敬建言疏鑿通州至中都河改引渾水溉田於舊
牐河踪跡導清水自昌平縣至通州高麗莊入白河
總長一百六十四里一百四步塞清水口一十二處
共長三百一十步壩牐十一處共二十座節水以通
漕運從之首事於至元二十九年之春告成於三十
年之秋凡役軍一萬九千一百二十九工匠五百四

上工水手三百一十九設官囚隸百七十二計二百八十五萬工用楮幣百五十二萬錠糧三萬八千七百石木石等物稱是役興之日命丞相以下皆親操畚鍤爲之倡先是通州至大都五十里陸輓官糧歲若干萬民不勝其瘁至是皆罷之武宗至大四年六月省臣言通州至大都運糧河牕始務速成故皆用木今爲永固計宜用磚石以資修治從之至泰定四年始修完焉文宗天歷二年三月中書省臣言世祖

時開挑通會河安置牐座全藉上源白浮一畝等泉
之水以通漕運今各支及諸寺觀權勢私決隄堰澆
灌稻田水破園圃致河淺妨漕事奉旨嚴禁

又白浮甕山成宗大德七年六月甕山等處看牐提
領言自閏五月二十九日始晝夜雨不止六月九日
夜半山水暴漲漫流隄工衝決水口於是都水監委
官督軍夫自九月二十一日入役至是月中輟工實
役軍夫九百九十三名十一年三月都水監言巡視

白浮甕山河隄圯三十餘里宜編荆笆爲水口以泄
水勢計修笆口十一處四月興工十月工畢仁宗皇
慶元年正月都水監言白浮甕山堤多低薄傾陷處
宜修治來春二月入役八月修完總修長三十七里
二百二十五步計七萬三千七百七十三工延祐元
年四月都水監言自白甕山下至廣源牐隄堰多淤
澱淺塞源泉細微不能流通由是會計工程差軍千
人疏治泰定四年八月都水監言霖雨壞甕山諸處

笆口漫沒民田計料工物移文工部關支修治自八月二十六日興工九月十二日工畢役軍夫二千名實役九萬工壩河亦名阜通七壩成宗大德六年三月京畿漕運司言歲漕米百萬全藉船壩夫力自冰開發運至河凍時止計二百四十日運糧四千六百餘石所轄船夫一千三百餘人壩夫七百三十名俱晝夜不息今歲水漲衝決隄壩六十餘處雖已修畢恐霖雨衝圯走洩運水請加修理自五月四日入役

六月十二日畢深溝壩九處計一萬五千一百五十
三工王村壩二處計七百十三工鄭村壩一處計一
千一百二十五工西陽壩三處計一千二百六十二
工郭村壩三處計一千九百八十七工于斯壩下一
處計一萬工總用工三萬二百四十金水河至元二
十九年二月中書省丞馬達忽等言金水河所經運
石大河及高粱河西河俱有跨河大橋今已損壞請
新之是年六月興工明年二月工畢至大四年七月

奉旨引金水河注之先天殿西花園石山前舊池置
閘四以節水閘七月興工九月成凡役夫匠二十九
爲工二千七百二十三除妨工實役六十日隆福宮
前河英宗至治二年五月會計修浚三年四月興工
五月工畢已役軍八百爲工五千六百三十五海子
岸仁宗延祐六年二月都水監計會前後與元修舊
石畔相接五月興工十一月工畢至治三年三月大
都河道提舉司言海子南岸東西道路當西城要衝

金水河浸潤於上海子風浪衝觸於其下且道狹不時潰陷泥濘車馬艱於往來如以石砌之實永久之計也泰定元年四月工部應副王物七月興工六月工畢本紀英宗至治元年十二月疏玉泉河泰定帝泰定元年八月罷浚玉泉山河役四年八月發衛軍八千修白浮壘山河隄文宗大厯元年八月發諸衛軍浚通惠河順帝至正九年三月壩河淺泄以軍士民夫各一萬浚之十四年四月命各衛軍人修白

浮輿山等隄堰 月赤察兒傳世祖至元二十八年
都水使者請鑿渠西導白浮諸水帝亟欲其成又不
欲役及細民勅四怯薛人及諸府人專其役度其高
深畫地分賦之刻日使畢工二月赤察兒率其屬著
役者服耒鍤卽所賦以倡趨者雲集依刻而渠成
謹案以上諸河皆通惠之上流也元史分別書之
今仍其舊

明實錄太宗永樂十年四月浚北京通流等四閘河

道共一萬七百三十七丈憲宗成化二年六月疏通
東西公生門至大門溝渠各一百一十五丈東安門
至南牆角溝渠二百二十五丈七年冬十月戶部侍
郎楊鼎工部侍郎喬毅上浚通惠河舊道事宜先是
漕運總兵官都督楊茂奏每歲漕運自張灣舍舟陸
運遇兩泥濘每車僱銀一兩僅載八九石其費皆出
於軍勘得通州至京城四十餘里有通惠河故道
石閘尚存先年曾奏欲於河稍水搬運又有議欲於

三里河從張家灣煙墩橋以西疏挑二十里灣泊糧船以避水患者今此河道通流其水約深二尺不勞疏挑惟用閘蓄水今運糧衛所每船二十五隻造一剝船自備米袋挨次剝運則運士得省腳費而困憊少蘇矣上命鼎毅遂同叅將袁佑等親詣逐一踏勘回奏云閘河原有舊閘二十四座以通水道但元時水在宮牆外船得進入城內海子灣泊今水從皇城中金水河流出難循故道行船除元人舊引昌平東

南山白浮泉水往西逆流經過山陵恐於地理不宜
及一畝泉水經過白羊口山溝雨水衝截俱難導引
外及勘得城南三里河至張家灣運河口延袤六十
餘里舊無河源正統間因修城濠作壩蓄水兼恐雨
多水溢故於正陽橋東低窪處開通濠口以泄其水
始有三里河名自濠口三里至八里始接渾河舊渠
兩岸多人家廬舍墳墓流向十里迤南全接舊河入
張家灣白河其水深處止有一二三尺淺處一尺餘濶

處僅丈餘窄處未及一丈今若用此河行船凡河窄
狹淤淺處必用浚深開濶凡遇人家房園墳所必須
拆毀那移且以今寬處一丈計之水深二尺若散於
五丈之寬止深四寸況春夏天旱泉脉易乾流水更
少糧船剥船俱難行使兼其沿河隄岸高者必須剷
削底者缺者必須增築填塞又有走沙急湍處俱要
創閘派夫修挑倘水淺少又須增引別處水來相濟
若引西湖之水則自河口迤西直至西湖隄岸未免

添置間座若引草橋之水必須於大祀壇邊一路剗
鑿溝渠亦恐有礙況其源又止此彰義門外玉匠局
等處馬跑等地泉亦不深遠大抵此河天旱則淤壅
淺澁雨潦則散漫衝突徒勞人力卒難成功決不可
開況元人開此河曾用金口之水其勢洶湧衝漫民
舍船不能行卒爲廢河此乃不可行之的驗也今會
勘得玉泉龍泉及月兒柳沙等泉諸水其源皆出於
西北一帶山麓堪以導引滙於西湖見今水半流出

清河若從西湖源頭將分水青龍閘閉住引至玉泉
諸水從高粱河量其分數一半仍從皇城金水河流
出其餘從都城外濠流轉通會流於正陽門東城濠
再將泄入三里河水閘住并流入大通橋閘河隨時
開閉天旱水小閉閘瀦水短運剥船雨滂水大則開
閘泄水放行大舟況河道閘座見存不用增造官吏
開夫見有不須添設臣等勘時曾將慶豐平津通流
等閘下板七葉剥船已驗可行若板下至官定水則

其大船亦可通行止是聞座河渠間有決壞淤淺處
要遂加修浚較之欲創三里河工程甚省況前元開
創此河漕運七八十年公私便宜後來廢弛今若復
興則舟楫得以環城灣泊糧儲得以近倉主納在內
食糧官軍得以就近關給通州該上糧儲又得運米
都城與夫天下百官之朝覲四方外夷之貢獻其行
李方物皆得直抵都城下卸此事舉行定實天意暢
快人心懽悅足以壯觀京師萬萬年太平之氣象也

乞勅自西山玉泉一帶并都城周圍濠塹大通橋直抵張家灣一路河道分玉逐一修浚如此則不惟省一時糧運之腳價實足以垂萬世無窮之利益矣疏入命下所司八年正月工部奏修河一事宜取旨命依原擬量撥官軍四萬浚京城濠塹其通州一路俟完工以聞十一年八月命浚舊通惠河勅平江伯陳銳右副都御史李裕戶部右侍郎翁世資工部右侍郎王詔皆漕卒自下流爲始疏浚壅塞修閘造船合

用糧料匠作於各司取用務求成功仍委附近公差御史察其不聽約束者以聞十二年五月漕運總兵官平江伯陳銳等奏通州修造通惠河開成欲將通州等處水關閘座與通永橋閘俱量爲疏浚修改以便漕運從之六月浚通惠河成自都城東至大通橋張家灣渾河口六十里興卒七千人費城磚二十萬石灰一百五十萬斤閘板椿木四萬餘條鐵桐油各數萬計浚泉三增閘四凡十月而畢漕舟稍通增平

江伯陳銳祿米歲二百石是河之源在元時引昌平縣之三泉俱不深廣今三泉俱有難引雖獨引西湖一泉又僅分其半而河制窄狹漕舟首尾相銜至者僅數十艘而已無停泊之處又沙冰易淤雨則漲潦旱則淺涸不逾二載而淺澁如舊舟不復通然銳之所增祿米猶歲給不絕識者媿之九月銳奏通惠河雖已通行然其間猶有未畢工者欲再疏浚使加深濶擬摘江北運糧衛所軍約一萬名委都指揮等官

督管於明年三月與工宅官給以廩給田糧食鹽從之武宗正德元年十二月命戶部郎中郝海工部員外郎畢昭會同漕運叅將梁璽修理會通河起大通橋迄於張家灣有閘數座然地形高下懸絕蓄水甚難卒不能通行舟楫二年九月海昭等奏修復大通橋至通州河道及閘十二壩四十六凡用銀四萬五百七十兩有奇議者謂漕粟自張家灣入京僦車甚費故欲開河通船以免陸運之艱然地形水勢高下

懸絕河雖開而無所濟也世宗嘉靖六年十月御史
吳仲言通州運河元時郭守敬創建已有明效先朝
陳銳亦累以爲請今通流等八閘遺跡猶存原設官
夫具在因而成之爲力甚易而循勢因利之家從中
撓之或倡風水之說或謂絕灣民之利皆不足信誠
令閘運歲可省腳費二十餘萬又漢唐宋時漕皆從
汴渭直達京師未有儲國儲於五十里之外者今令
京軍支糧通州率稱不便而密雲諸處皆有間道可

通此非細故請下戶工二部定議修浚僦舟夫畧運
百萬試之與陸運兼行俟次第就渠逕達京倉於計
甚便因命侍郎王軌工部侍郎何詔及御史吳仲等
董其事至是軌等言地形從大通橋至白河高可六
尺若大興工浚之深至七尺通引白河則漕船可直
達京城諸閘可盡能此永久之利然未易議也爲今
之計惟應修浚河閘然通流閘逕二水門南浦土橋
廣利閘三皆衝市閭閻中不便轉盤從溫泥河濱舊

小河廢壩西不一里至堰水小壩誠修築之令通普濟閘則逕易可省四閘兩關轉盤之難閘壩皆宜添設官吏人夫守視竊計修閘浚渠築壩之費當用銀一萬五閘置船各六十一船日運糧萬石造船之費五萬五百通漕糧二百三十萬石歲省腳費五十萬三千五百若糧多水少聽以車轉水陸並進運事易竣亦可早還宜令戶工二部各舉屬各一人兵部推指揮一人充叅將專司修理轉運諸務會同巡倉御

史各奉勅行事募軍萬餘人作之務在堅久時上意已決命如擬舉行六年十一月禮部尚書桂萼上疏請修通惠河不便請改修三里河上以其疏下大學士楊一清張璁擬票一清言通惠河因舊開行轉盤之法可以省迎軍之力宜斷行之璁亦言通州河道經元郭守敬修浚今開壩具存聞京師至通州五十里地形高下纔五十尺以五十里之遠近灘五十尺之高下無所不可誠浚甕山樂以蓄諸山水引神山

泉以合下流之歸紆回以順其地形因時謹其濬治
此一勞永逸計也上深然璉言七年六月御史吳仲
郎中何棟尹嗣忠都指揮陳璠奉勅開濬通惠河成
仲等因疏五事一時疏濬以通運道言大通橋起至
通明石壩四十里地勢高下四丈有餘中設慶豐等
五閘蓄水今已通運然地勢陡峻土皆深沙夏秋大
雨河流暴漲衝決淤塞所宜預處請行管閘主事坐
守閘壩往來巡視一改閘座以防水患言夏秋久雨

西山水發皆由閘河東流閘門隘小水泄不及遂至
泛漲衝決隄壩此山不測非人可爲原議障水石壩
今已修成又通流閘至通州城中市井環繞積水丈
餘又西水關久浸水中俱非長便舊有慶豐上閘平
津中閘今已不用拆運通州西水關外創造石閘一
座將前石壩南移二十餘丈改造石閘一座平時閉
板水落起泄疏入上悉從其言十二月通惠河成糧
運旣至者一百九十九萬三千八百有奇省腳銀十

一萬二千三百餘兩當扣除入戶部吳仲以運軍疲
敝請暫給三分之一俟一二年後并減歲運加耗以
寬窮民庶軍民兩受其惠戶部覆奏報可十一年五
月工部覆中軍都督府經歷司經歷趙善鳴奏請浚
大通橋至通州運河增添間座多修漕艍運通州糧
入京城以實根本修自都城至儀真運河淺澁自良
鄉及涿州達保定河間真定迤南一帶陸路低窪以
保轉輸報可三十三年七月以久雨通惠河水溢命

有司修築閘壩隄岸穆宗隆慶四年三月工部覆御史楊家相所陳開河道以利漕輓謂朝陽門外故有河渠雖歲久漸湮尙可復之以便東倉之運上命如議行神宗萬曆四十年六月以通惠河衝決行河臣嚴飭挑濬修築熹宗天啟元年閏二月巡按直隸御史張新詔言濬裏河計費纔七千兩所省腳價十二萬若由大通橋至朝陽門尙有三里計其地平衍間曠有掘就河身現在倘導玉河之水稍溯而北至朝

陽門量建閘座又剥船若干隻糧運到時經於門下
上車似爲便計蓋會典開載車戶腳費自大通橋至
東倉每石銀一分六釐近又議加三釐至西倉銀二
分三釐若復省路三里許則東倉腳費可減十之六
七兩倉腳價可減十之三四總而計之總減一半每
歲京糧以二百六十七萬爲率即可省腳費二萬六千
餘兩彼從通州至大通橋凡四十里止費銀七千此
三里許之地能費幾何卽除挑濬外建閘造船等費

只消一年腳價之半便已寬然有餘一成之成每歲
省銀二萬六千以三十年之通計遂得七八十萬入
太倉矣詔部議明史河渠志正統三年設正陽門
外減水河并疏城內溝渠六年造宣武門東城河南
岸橋修江米巷玉河橋及隄并浚東城西南河景泰
二年修玉河東西隄浚安定門東城河嘉靖二年修
德勝門東朝陽門北城垣河道方輿紀要大通河
永樂五年北京行部言自西湖景東至通流凡七閘

河道淤塞自昌平東南白浮村至西湖景東流水河口一百里官輪置十二閘請以時修治今並湮廢又通州陸輓至邠城僅五十里元人開運河總計百六十里置牐壩二十四所然通州以西雖有慶豐文明會川等閘皆河流淤淺而積水潭在禁城北漕舟既集亦無停泊之所又分流入大內然後南出其啓閉蓄洩非人所得專故通惠河幾廢嘉靖六年始濬大通橋至通州城北之石壩凡四十里地勢高下四丈

修慶豐上下二閘平津上中下三閘又東爲普濟閘以蓄水造剥船製布囊盛米遞相轉輸以達都中軍民稱便〔水部備考〕大通河元名通惠明初六十年來河幾湮塞成化十二年始命平江伯陳銳疏通之漕舟曾至大通橋下後假黑胄之說事竟阻壞正德二年又命郎中畢昭郝洵叅將梁璽復疏之所費不貲功不就嘉靖六年巡倉御史吳仲因前御史向倩言開濬七年五月河通糧運無阻是河至今通行大

省陸輓之費

謹案桂萼奏議言大通橋河元郭守敬由古水道
開濬非是守敬創始蓋西山諸水由皇城東出每
當山水泛漲由此而洩引之入白河以濟漕運故
置閘以時啓閉初非爲行舟設也成化十二年平
江伯陳銳不察其故建言修復憲宗命戶部左侍
郎翁世資工部左侍郎王詔挑濬仍濬西湖諸泉
以益水勢可放運船千餘直抵大通橋下旣而水

急岸狹船不可泊未幾卽耗船退幾不能全遂不
復行正德七年亦嘗挑濬竟無成功蓋京師之地
西北高峻自大通橋下視通州勢若建瓴而強爲
之未免有害非徒無益而已又舒棻梓谿集云京
師形勝以堪輿家論之玉河之水當直出會南海
子從天地壇前轉東入潞河方爲自然崇文門外
閘河宜塞之庶幾左臂不斷此乃帝王建都萬代
之計也攷閘河自明嘉靖年修治功成至今賴之

舒茶所言專與人異今存其說以見讒人之交亂
國是所謂無稽之言勿聽世宗可謂英斷之主已
大清會典大通河中設六閘蓄水以濟輓運設閘夫二
百二名康熙十九年

命官挑濬通州至天津河道天津以南仍令總河衙門挑濬
二十七年覆准沙河城東呂閣土溝葛渠三莊及通
州兩河會流處建閘蓄水通州以下東嶽廟南營等
處建小隄蓄水以濟漕運三十三年

特命大臣詳閱通州至西沽河隄堵塞決口三十五年挑濬
由通達京五閘河道加築隄岸建滾水壩以洩水三
十六年挑護城河引大通橋運艘達朝陽東直等門
四十六年開通惠河起水磨閘厰砂子營至通州石
隄止中建七閘閘夫一百十二名運通州米由通流
河至本裕倉四十八年通州西岸溢隨加堵塞五十
三年題准派監督創挖會清河淤塞修補隄岸六十
一年歸坐糧廳執掌乾隆二十三二十五兩年屢加

濟治三十六年請挑濟通惠河大通橋河道是年六月水勢驟長漫溢隄頂平津下閘普濟閘南岸隄身冲決三十餘丈

高宗純皇帝命劉浩烏諾璽會同倉場侍郎瓦爾達修築竣工四十一年將通惠河各閘工程改歸通永道管理其修艖閘座添換閘板等費仍循例於坐糧廳稅課項下支領嘉慶二年平津下閘南岸復決隄岸八丈六年平上閘北岸又決隄十二丈平下閘南岸汕刷

十二丈普濟閘南岸汕刷二十三丈西門外滾水壩
南岸汕刷十三丈王相公莊北岸汕刷十二丈五尺
並卽補築

官司

元河道提舉司

元史河渠志大都河道提舉司秩從五品提舉一員從五品同提舉一員從六品副提舉一員從七品

通糧千戶所

王圻續文獻通考元至元十六年通惠河運糧千戶所秩正五品掌漕運事分立都漕運使直沽廣

通倉秩正七品

河道所都事

元史韓若愚傳由武衛府史授通惠河道所都事
開河有功詔賜錦衣一襲遷留守司都事

謹案元史本紀世祖至元三十一年八月己丑以
大都留守段貞平章政事范文虎監浚通惠河給
二品銀印此一時權攝之官非常職也

明慶豐閘主事

明實錄太宗永樂六年四月設北京通會河慶豐
平津澄清通流普濟六閘每閘置官一員二十二
年十二月罷海子巡視官 水部備考慶豐閘主
事一員管通州以上閘務設自成化間三年更代
至嘉靖七年通州置郎中遂裁此員而其事并之
郎中矣

工部管理河道官

明實錄憲宗成化十一年癸未增設工部管理河

道官一員漕運總兵官平江伯陳銳奏比奉詔疏
浚通州至京河道工將就緒請設官理之并提督
青龍等橋壩源等閘及西山一帶泉源時工部郎
中陸鏞丁憂服闋因以命之

順天府通判

明實錄成化十二年六月丙申陞山東兗州府通
判陳翼爲順天府通判專理通州以上河道并西
山一帶泉源

通惠河郎中

明實錄嘉靖七年以修濬大通河成設郎中一員
駐劄通州往來督理兼管天津一帶河道 明會
典大通橋至通州石壩裏河兩座雁翅剝岸每年
二月管理通惠河郎中會同戶部坐糧廳郎中查
勘估計將椿木於通州竹木局半段磚於磚廠各
取用外移浴戶部動支太倉銀庫扣省腳價每
年約用二百兩

夫役曰閘夫曰淺補小甲曰修隄小甲今裁

明會典夫役萬厯四年新舊額宛平縣青龍等閘
五共夫七十五名大興縣慶豐等閘三共夫四十
七名通州普濟等閘五共夫九十三名淺補小甲
一十名夫一百名修隄小甲八名夫七十五名自
大通橋起至通州石壩四十里地勢高下四丈中
間設慶豐等五閘以蓄水各閘各設官吏共編夫
一百八十名每名工食八兩造剥船三百隻每隻

價三十五兩分置各閘貢經紀領之 明實錄初

永樂間欲通漕舟直至京城自文明門至通州置
六閘俱設官吏徵取江湖廣河南民二千三百
餘人爲閘夫其後漕舟竟不能至而閘夫逃亡過
半宣德十年吏部侍郎趙新言閘夫逃避所司逮
捕累及無辜事下工部覆奏止將在役者存留其
老疾者放還逃亡者勿追文明惠河二閘旣展入
城中宜罷官從之武宗正德六年五月革慶豐通

流等聞新設夫及剝船以工部奏河爲沙淤剝運不便也世宗嘉靖元年十二月復提督漕運總兵官楊洪奏言今運道淤淺查得閘河白河一帶各有額派挑淺夫役官司因循廢弛以致漕舟困於起剝軍吏因而蠹耗請行總督河道及管理泉閘諸臣時時臨閱淺處督工疏濬仍令所在軍衛有司驗視漕舟修補破敝以備後運從之

本朝設通惠河分司滿洲理事官筆帖式後歸通永道

管理

天清會典通惠河分司駐劄通州順治初差漢司官一員三年更代十二年添差滿洲理事官一員筆帖式一員一年更代十四年裁滿官三年更代康熙元年復設一年更代六年裁九年復差滿司官一員筆帖式二員三年更代十年裁筆帖式十八年照內外河差例一年更代二十年改爲三年更代二十三年改令各衙門掣籤差遣三十九年仍改

一年更代四十年裁分司歸并通永道管理

通州運河道兼永平通薊遵等處屯田海防糧餉管

通惠道一員

駐劄通州

漕運通判一員

駐劄張家灣

通州管河州同一員

通州管河州判一員

通流閘開官一員

慶豐閘開官一員

柳村閘閘官一員

駐劄明園

鳳

通州上汛把總一員

通州中汛經制外委一員

通州下汛經制外委一員

謹案通州管理大通河武職員弁互見白河北運

河官職卷

大通河額設河兵四十名內食戰糧者四名食守糧者三十六名

柳村閘閘軍八十二名每名歲給工食銀十二兩

謹案安豐天興翔帆三閘已經折毀所有雲津長
清長源順城四閘原額設閘軍八十四名今裁汰
天興閘閘官一員又裁汰雲津閘閘軍二名

祠廟

龍王廟在西湖隄上

帝京景物畧西湖行八九里至龍王廟廟之旁黑龍潭又行一里隄盡右有村上青龍橋卽玉泉山下也

西海子神祠

明實錄世宗嘉靖十四年九月庚申初建西海子神祠先是上召禮部尚書夏言於無逸殿諭之曰

西海子歲以午日奉兩宮遊宴止行望祀宜特建
祠宇言退上疏請於北閘口湧玉亭後隙地建祠
以答神貺詔可 典彙嘉靖十五年建金海神祠
於大內西苑湧泉亭以祀宣靈宏濟之神水府之
神司舟之神二十二年改爲洪濟神祠

天妃宮

五城坊巷衚衕集出朝陽門沿河往南有天妃宮
明邱濬天妃廟碑記京師舊有天妃廟在都城

之巽隅大橋迤之西景泰辛未道士邱然源援南京例請升爲宮然規制尚存其舊弗稱宮之名也成化庚子然源乃募材鳩工拓大而一新之祠神之宮茲其稱矣

時應宮在西安門內金鰲坊南雍正二年勅建以祀龍神

以上在宛平大興二縣

通惠祠明嘉靖四十五年建祀建議開通惠河御史

吳仲

以上在通州

水利

北齊高粱水田

北齊書斛律羨傳使持節都督幽平營東燕六州諸軍事幽州刺史導高粱水北合易京東會於潞因以灌田邊儲歲積轉運用省公私獲利焉

金大寧宮左稻田

金史張謹言傳護作大寧宮引宮左流泉灌田歲穫稻萬斛

元西山營田

林環納齋集徃時何承矩耕水田於河北虞集議
海田於京東脫脫大興營田自西山東至遷民鎮
南起保定府河間北抵檀順皆從佃種水泉陂塘
之迹門堰捍築之方召募教授之法器具工作之
資蜃蛤粟米之富爲之按成式法徃昔數歲之後
其效立見

明上麥莊橋稻田

帝京景物畧水從高粱橋而西上麥莊橋過橋爲湖界以長隄湖在隄南稻田塲在隄北

三聖庵稻田

〔燕都遊覽志〕三聖庵在德勝街左巷後築觀稻亭北爲內官監地南人於此蒔水田稔秔分塋夏日桔槔聲不減江南袁中道記遊德勝門內東偏有公田若干頃中貴治之引水爲池沿池數里綠楊鬱鬱一望無際池西一庵曰三聖面市背田

鄭公稻田

燕都遊覽志鄭公莊在萬壽寺五度橋而南有亭
在平曠亭外俱稻田緣隄蓮芡蓋鄭戚畹園也

德勝門稻田

客燕雜記德勝門水次稻田八百畝以供御用內
監四十人領之

龍華寺稻

帝京景物畧成化三年錦衣衛指揮僉事萬貴自

剡寺成疏請寺額於朝憲宗賜額曰龍華寺門外
稻田千頃